

Nzryr-krbz Pol Mz Lr Filipae Natq Ngr Nzaplxtqngr Mz Nzryr-krbz Pol Mz Lr Filipae

Letz lc yrbz aposol Pol mz lrmakxtr kcng tzmncng taon kxetu Filipae mz provins kc Masedonia. Mzbq ka Masedonia nzrpibz kandre kc Gris. Trgalr lr Filipae kxnzrlxngiting mzli kx Pol nidr badr Saelas, Timoti, x Luk nzkrlybzlr mrlcde mz nzvzpx-krde krali mz yiz 51 AD mz nibr nzrmcngr mz Jiszs. ✧ A' sc tzlxngiting mz nzryapwx-krbzlr Nrpakxmrlz badr. Oklatimoule nidr mz nibrde. Mz nzwzngl lc, leplz nzqqlung kxtrngiulrJiu nzrlxngitilr Jiszs.

Yrle letz lc mz nzwrde kc kai tqmnc-ngrde mz presin mrkc Rom. ✧ Yrle mz mzlir yiz 60—62 AD. Mzli lc tqyr-kzpzle letz mz Filimon, lr Efiszs, x lr Kolosia. Letz lcng amrlx dzbede esz' kx nzyrng mz presin. Mz letz lc awibz mz lr Filipae murde nzatwzlr-ngrbzlr trau x Epafroditzs bade mz nzokatr-krdr nide.

Nzalvztrngl kxmyapxbz mz letz lc rpile kx na-aelalz-ngrm drtwrgu nzaetqngr drtqgu mz nzvz-nqblq-krqu Jiszs Kxnzmcpx. Murde mz nzaxvctr-krbzku bade mz nzetqkr drtqde, sa na-amrlzle nigu. Pol rpi-kzle kx leplz neng Gct drtwrdr naesz'ti x na-aclvetio-lzbbqng mz kxnzalvztr-rbrng.

Mrkcng Mz Letz Lc

✧ : Aposol 16:6-40 ✧ : Aposol 28:30-31

Pol awibz mz lr Filipae x krka'-ngrde nidr. [1:1-11]

Kxmule-esz' Pol mncpxm mz presin, drtwrde elalzm, murde suti drtwrde kx leplz naglql-zlr Kraes. [1:12-26]

Pibzle badr kx natu-amqngi-zvzng mz nzrlxngiti-krdr, x nzmnc-krdr natakitrde leplz neng Gct. [1:27—3:1]

Pibzle badr kx na-avzo-lzbqng da kc tqwai Kraes ma nzavzo-lzbq-krde. [2:1-11]

Pi-kzpzle badr kx navz-nqblqlr nzmnc-krde x natq Kxetu nakrlzbzle nzbz-krdr. [dckrlzde 3]

X pi-mopwzle badr kx naesz'ting mz drtwrdr, na-abrtzlvz-zvzlr nzkrlz-krdr Kxetu, x drtwrdr naesapx mz nzmnc-zpwxngr kx kabz Gct badr. [dckrlzde 4]

¹ Ninge Pol, nigr ncdr Timoti, kxnzawz-nrbalqng ne Mevalu Jiszs.

Ryrbzkr bamu, nimu leplz kxnztrng ne Gct amrlx kx nzaxvctrpzng mz Mevalu Jiszs. Nimu kcng tzmncng mz taon Filipae, badr kxnzaclvelr nimu x kxnzaclveng dalr makxtr.

² Krka'-ngrne kx Gct Trtegu x Kxetu rgu Jiszs Kxnzmcpx, naokatrlr nimu mz zmrlz ngrdr kxmyalz murde namnc-zpwxamu.

Pol Krka'-ngrde Lr Filipae

³ Awi-zvz-ngrbo mz Gct rnge mz nzdcpxkr mz drtwrnge nimu.

⁴ X mzli kznikeng krka'-ngrne nimu amrlx, krka'-abrtz-zvzx.

⁵ Murde okatr-zvzamu ninge mz nzwz-lxblr-krgru mz Nrpakxmrlz, yzuo mzli kc kai tqrlxngiti-ngrnamu, krlzmlz mzli ka.

⁶ X krlzti-angidrx kx Gct dekc tqayzutrpzle nztekqtr-krde nimu, x sa navz zvz nztekqtr-krde nimu nakrlzbzle mzli kx na-ayrkrpx-ngrdele, mzli kc nayzlu-mou-ngrm Mevalu Jiszs.

⁷ Nimu la tqyc zvz mz drtwrnge. X takitrde nzaoti-zvzkr drtwrnge lc nimu amrlx ngrmu. Murde nargu tutr-lxblrpe mz nzwznggr kxmrlz mzli ka tqmncpx-ngrmc mz presin, x mzli kc tqaxplrtr-ngrne Nrpakxmrlz mz nzalvztr-krnge.

⁸ Krlz Gct kx trpokiawxu mz nzrpi-krbo kx nzmrlzti-zlwz-krnge nimu vzpxm mz nivz lr Mevalu Jiszs.

⁹ X krka'-ngrne nimu, kx nivz lrmu naetunepx zvz, mz nzkrly-angidr-krmu Gct x nzabrtzlvz-krmu da kxtubq.

¹⁰ X nakrlzamu nzmcpnxngr da kx brngz-esz'ngr, x nzmnc-krmu natubq x natr nakrlzbzle mzli kc Kraes nayzlu-mou-ngrmle.

¹¹ X krka'-ngrne kx nztubq-krmu lc naetunepx zvz mz nzaxvctr-krbzmu mz Jiszs Kxnzmcpx, murde leplz naglqpxlr Gct.

Nzmnctr-ngrbz Mz Kraes

¹² Mzlengeng x inwengeng, abrtztx-ngrne nzpi-krbo bamu kx kxmule-esz' nzatrkatilr ninge, a' krlc okatrle x axplrle nzwz-krnge mz Nrpakxmrlz.

¹³ Murde kxnzaclveng mz ma nyz King kc etu mrka Rom x kzdung kz leplz nzkrlylr kx mncpxmc mz presin murde wztrpo mz Kraes.

¹⁴ Nzmncpx-krmc lc mz presin, apqtr-mopwzle nabz mzlegung kxnzkqlung. X mzli ka nelzdr br mz nzpipx-krdr Nrpakxmrlz, x trnzmwxlrpeung.

¹⁵ Kxmule-esz' kzdung nidr nzdobulvzlr x sc tzyapwxtipx-ngrdr Nrpakxmrlz mz drtwr kxmwa, a' kzdung nzryapwpxpngx murde suti drtwrdr nzokatr-zpwxlr ninge, vzpxm mz nivz lrdr.

¹⁶ X nzkrzlzlr kx Gct mcpyle ninge mz nzaxplr-krnge nzwzkr Nrpakxmrlz.

¹⁷ A' ncblo lc-kzng tzyapwxtipxlr Kraes, murde suti drtwrdr namyalzng mz nzamatqkr leplz nidr. X nzrpilr na-aetunepx-zlwzlr nztalvzokr nabzngc mzli ka tqmncpx-ngrmc mz presin.

¹⁸ A' sa tqmrlz ye! Murde da kx myapxbz ngi nzvz-zvzkr nzryapwxtipxngr Kraes. Kxmule-esz' nzyapwxtipx mz nabz kxnzpokianger o mz nabz angidr, a' nzryapwxtipxngr Kraes, dela tqabrtz-ngrne. X abrtz-zvz-ngrne.

¹⁹ Murde krlzx kx sa na-aovxiox mz nzkrka'-krmu ninge, x mz nzokatrkr Mqngr Jiszs Kxnm-cpx.

²⁰ Da kx pqtx zlwz mz drtwrnge, x da kx obqtipxx, kx bzkq taox mz nzwztr-krbo mz Kraes. A' suti zvz drtwrnge kx nelzngc bzkq twz-prlzm, myapxbz mzli ka. Murde na-alex da kx naglqpxngr Kraes, kxmule-esz' mz nzlu-krnge o mz nzbz-krnge.

²¹ Murde mz nzmnc-krnge mz nrlc ka, mncbo mz Kraes. A' nzm nzbzx, sa namnc-zvzpebo bade Heven.

²²⁻²³ Trkrlzwxu myx kxmrlz, nzlungr o nzbzngr. Mncx mz drtwr kxli. Nzmu namnc-

zvzbo mz nrkrdrdq, krlzx nzwztr-zvz-krbo mz Kraes. A' suti drtwrnge nzrlaszpx-krnge nzlu-krnge mz nrkrdrdqnge lc, murde namnctrpebo mz Kraes. Murde nzmnc-tr-ngrbz bade ngi da kx myapx-esz'ngr.

²⁴⁻²⁵ A' krlzx kx sutibe drtwrmu ninge. Mz nzmu-krde lcde, krlz-kzx kx sa nalubex. X sa namnc-zvzbo bamu mz nzokatr-krnge nimu. Murde nzlxngiti-krmu Jiszs x nzabrtzlvz-krmu nide naetunepx.

²⁶ X nayzlu-mopwc' mzli kc Mevalu Jiszs na-avzpx-ngrmle ninge mz presin, murde na-abrtzlvz-kzamu nzkriz-krbo nimu.

Tu-amqngiamu Mz Nzotangr

²⁷ Kxmule-esz' da kx prtz, a' da amrlx kx aleamu natakitrde Nrpa ngr Kraes. Murde kxmule-esz' vzmc mz nzmc-krnge nimu mz mzke', o mncmc rlru, a' naxlrtpwo nrpa kx tu-amqngiamu mz drtwr kxesz', mz vea ngr Nrpakxmrlz.

²⁸ Bzkq mwxlrtiamu ncblo keng tqotaamu badr, murde Nrpakxmrlz aelwapx-ngrde kx Gct sa naodatile nidr, a' na-arlapxle nimu.

²⁹ Gct rlr-ngrbzle bamu nzwztr-krbzmu mz Kraes murde lxngitiamu nide. X rlr-kz-ngrbzle nzetqtr-krbz drtqmu bade.

³⁰ Murde mzli ka nzxpungr kcpwz tqrmcti-amu, dekc tqrmcti-zvzx.

2

Nzavzo-lzbqkr Kraes Kc Tqmyalz-esz'ngr

1-2 Batrpszmu nzalalz-krm drtwrnge, mz nzale-krmu da lcde seng. Drtwr naesz'ti murde Kraes sc tqapqtrpzle drtwrmu. X nivz lrmu na-apule nivz lr Kraes kc tqmrlztile nimu. X nzmnc-lxblr-krmu natr murde odutr-lxblramu badr Mqn-grkxtr. X da kx napnz drtwrmu naesz', murde mrlzti-lzbqamu x tqyc mz drtwrmu kztemu.

³ Bzkq trkibramu mz nztrngz-krbzm da kx na-aetu-lzbq-ngnamu, a' na-avzo-lzbqamu, x na-aoti drtwrmu kx leplz namyaszpxpwzlr nimu.

⁴ Bzkq aoti txpwz drtwrmu nimu esz'-krmu, a' na-aoti kz drtwrmu da kx suti drtwr kztemung.

⁵ Nqmq nr nzao-krmu drtwrmu na-apule Mevalu Jisz.

⁶ Kxmule-esz' Kraes esz'-krde nide Gct, X apule Gct mz da amrlx x nzrsakrlrng ncd, A' trlolvz-amqngileu mz nzrsakrlr-krdr ncd.

⁷ A' yrlqtxole kzdung da mz nzrsakrlr-krdr ncd, Murde navzom mz nzngini-krde kxnzawz-nrbalq,

X namika mz nzngini-krde ncblo.

⁸ X mz nzaelwapx-lzbq-krde apule ncblo, avzo-lzbq.

X vz-nqblq-zvzle me pnz drtwr Gct,

Kxmule-esz' nabz,

Mz nzrtqlvztrngr nide mz kros.

⁹ Mz nzmu-krde lcde,

Gct kabzle bade me matq esz'ngr Heven,

X aprcbzle bade drtq kx myaszlzle drtq amrlx.

¹⁰ Murde kxnzmncng Heven amrlx,

X kxnzmncng mz nrlc amrlx,

X kxnzbpeng amrlx,

Na-atuong zpr mz nzangio-krdr Jiszs. ✧

¹¹ X leplz amrlx naglqpxlr Gct Trtegu

Mz nzpipx-krdr kx, "Jiszs Kxnmcpix nide Kxetu Lod."

Na-aelwapx-ngrbzmu Lrpzki Angidr Mz Leplz Mz Nzkrzl-krbzlr Gct

¹² Mzlengeng x inwengeng, mzli kc tqmnc-ngrbo bamu, vz-nqblq-zvzamu natqng. A' mzli ka trmncpe-ngrpwc'u, namyapx-mopwz nzvz-nqblq-krmule. Doa kx esz' mz nimu na-ayrkrpxle nzwzng kx tqyzuo Gct, mzli kc tqarlapx-ngrde nide mz nzamatq-krde Gct mz zmwxl.

¹³ Murde Gct kc tqmncbz bamu, okatrle nimu murde nasuti drtwrmu nzvz-nqblqng me pnz drtwrde x nakrlzamu nzrvz-nqblqng.

¹⁴ Mz da amrlx kx rtrngztibzmu, bzkq drtwrmu lc x talwzamu.

¹⁵ Kxmule-esz' mncamu mz mzlr kxtrnzrlxngitiung x kxdrka'-ngrng, a' nabzmu natr x natubq mz nzngini-krmu doa neng Gct. Murde nqm q krmu na-aelwapx-ngrbzle badr lrpzki angidr mz nzkrzl-krbzlr Gct.

¹⁶ X nayapwxtibzmu nrpa ngr nzlungr badr. X dekc, sa na-abrtzlvz-ngrne nimu mzli kc nayzlu-mou-ngrm Kraes kalr. Murde nzvz-krmu lc sa na-aelwapx-ngrde kx drtqng tretqne-nrbalqu mz nzvz-krng.

¹⁷ Nzrlxngiti-krmu apule blz kc tqkabzmu mz Gct. X opxm kx ycp pipz nznrbqng ninge. Kxmule-esz' nzpuliokr mepyr rng na-ayrkrpxle

blz krmu, a' drtwrnge sc tqelalz-ngrm nzprrtr-krnge mz nzaetqkr drtq Kxnmzcp x mz nzprrtr-kz-krmu mz nzaetqkr drtqde.

¹⁸ X nimu kz drtwrmu naelalm x naprrtpa'mu mz nzabrtz-krnge, kxmule-esz' nike prtzm bange. *

Nzatwzlrngr Timoti X Epafroditzs

¹⁹ Drtwrnge abrrtpo mz Kxetu Jiszsz kx sa natwzlr-ngrbo Timoti bamu. Murde mz nzyzlu-krmle, drtwrnge na-apqtrple mz nzyapwxti-krmle nrpa ngrmu.

²⁰ Trpnzngr ncblo mrka kx apule Timoti, kx yc zlwz mz drtwrde nimu.

²¹ A' opxm kx ncblo kc-kzng tqwzkrng badr nzaoti txpwz drtwrdr me pnz drtwrdr esz'-krdr, a' trnzaotiu drtwrdr nzwzkr Mevalu Jiszsz.

²² Krlz-angidramu nzmrlzkr nqmq krde. Okatrlle ninge mz nzryapwxtipxngr Nrpakxmrlz apule doa kxtopwz kx nzwzng ncdr trtede.

²³ Pnzpe drtwrnge kx sa na-atwzlr-ngrbo nide bamu, mz nibr nzxlr-krnge nike naprtzm bange mrka.

²⁴ Abrrtpo drtwrnge mz Kxetu rgu kx mzli trnaboii x ninge kc tqvzpe-kzpc' mz nzoklati-krbo nimu.

²⁵ Kxmule-esz', a' aotipe drtwrnge nzayzlu-kai-krbo Epafroditzs bamu. Nide mzlegu kx likr ncdr mz nzwzng kxesz'. X xplrlvzkr rlilrgr

* **2:18** 2:17 Nzkqlu-krdr 15:1-12 ycmnetr-ngrde blz kx nzka-nrbalqng, x mz nzka-krbzlrle, nzka-zvz-kzpz waen kc tzpullo-ngrdr mz drtc'. Nzrlxngitkr lr Filipae apule blz lc, x nzmu Pol nabz, mepyr ngrde na-apule waen lc.

nzyapwxtipxngr Nrpakxmrlz. Atwzlr-ngrmamu nide mzli kc mz nzokatr-krde ninge.

²⁶ Sutitx zlwz drtwrde nzmc-krde nimu amrlx, x nabzde talvzo murde nzxlr-krmu nzyagox-krde.

²⁷ Yagoxtx zlwz x ycpwz pipz nzbz-krde. A' ycpengr drtwr Gct, x trbzu. Tryc-ngru drtwr Gct nide esz'-krde, a' ninge kz. Katxpxbzle nzvzkr drtwrnge kx nzmu navz-ebir-ngrm bange, nzmu Epafroditzs nabzle.

²⁸ Sutitx zlwz drtwrnge nzayzlu-krbole bamu, murde drtwrmu naelalmz mz nzmc-mou-krm nide, x nzvzkr drtwrnge sc tqyrkrpxpebz.

²⁹ Abrtzlvzamu nide mz nzprtr-krbzle bamu, na-apule mzlemu mz nzabrtz-zlwzng. X amatqamu ncblo amrlx kcng tzapulr nide.

³⁰ Ycpwz pipz nzbz-krde mz nzwzkr Kraes. Trmwxlru nzrka-krbzle nzlu-krde mz nzayrkrpxngr nzokatrng kx rblxbz bamu, murde mnc-rlrupwamu bange.

3

Nzmncngr Kx Tubq-esz'ngr

¹ Mzlangeng x inwengeng, natq kx napi-rmnrngro bamu nide sele. Na-abrtzlvzamu nzaxvctr-lzbq-krbzmu mz Kxetu.

Suti drtwrnge nzpi-kr-mopwo nikeng yrpekaipo bamu mzli kc, murde ma tqvz-rbramu.

² Aclvetio-angidramu leplz kcng tzapulr kuli kzipeto, tzaleng da kxtrka. Nzalvztr-ngrdr nimu kx suti drtwr Gct ncblo napakrng mz nzvz-nqblq-krde Nzesz'tikr Drtwr Kc Kai.

³ A' nzrpakrngr angidr mz Nzesz'tikr Gct Kc Ate delc tqtwzku mz nabzgu, nigu amrlx, a' trnztwzlr. Twzku nzrpakrngr angidr murde da kcng tq. Nzangio-krgr Gct vzpxm mz Mqngrde. Abrtz-ngrgu nzaxvctr-lzbq-krbzku mz Mevalu Jiszs. X trabrtrpwzkuu drtwrgu mz nzrpakrngr nrkrdrdq.

⁴ Kxmule-esz', a' krlz-kzx nzabrtr-krbo drtwrge mz da kxnmulr lcng. Nzmu namnc dq ncblo kx krlzle nzabrtr-krde drtwrde mz dalr nrkrdrdqde, myapxpwo!

⁵ Murde nzpakr nrkrdrdqnge mzli kc zbq rnge tqrtqmz-ngrde, mzli kc tzrmcngz mzke'. Ninge lr Israel, vzpxmc mz nqvi lr Benjamin. Ninge angidr mepyr ngr lr Jiu. X vz-nqblq-angidrx Loukxtr, da kc tzwailr Farzsi.

⁶ X mz drtwrge nzmwatikr, sc tqatrkatipec leplz neng Kraes, murde mz drtwrge nzesablqtilr Loukxtr. X mz nzvz-nqblq-krnge Lou sc Mosis tubq-esz'ngrx.

⁷ A' mzli ka, da kznikeng pix mzli kc mz nzaetu-lzbq-krnge, rtctxpe-ngrneleng murde namncpebo mz Kraes.

⁸ A' tr-rtctx-ngrwxu da lcng txpwz, a' rtctx-ngrne da amrlx kcng tqpqtitr drtwrge mzli kc, murde natwzx da kznike pqtr zlwz mz drtwrge mzli ka, krlcde nzklz-krnge Kxetu rnge, Mevalu Jiszs. Da amrlx kcng tqrtctx-ngrne nzapupemlr bange dcvi. X abrtzlvzx nzrtctx-krngeleng murde namnctr-lxblrkr mz Kraes,

⁹ x nanginipegr ncdz da kxesz'. Mz nzmu-krde lcde, nztubq-krnge trvzpxpuu mz nzvz-nqblq-krnge Loukxtr. A' vzpxm mz nzlxngiti-

krnge Kraes. Gct kamle bange nztubqngr lc, mz nzbtrtkr drtwrnge Kraes.

¹⁰ Suti drtwrnge kx nakrlzx nide x natwz-kzx zmatq kc tqtulz-mople nide mz nzbz-krde murde navz-nqblq-zvzx nide. Kxmule-esz' drtqnge etq x bzx, a' suti drtwrnge kx na-apu-zpwxx nide mz nzvz-nqblq-krnge me pnz drtwr Gct.

¹¹ Murde krlzx kx sa na-atulz-kz-mople ninge mz nzbz-krnge.

Pol Yrnitr Mz Nzkrlez-krbzle Bz Ngr Nzesangr

¹² Tr-rpipwc'u kx mncpex mrkc tqpnzm drtwr Gct bange. Trkrlezkapc' bz ngrde. A' sc tqabz-zvzx nzkrlez-krbole, murde dekc Mevalu Jiszs tqtwz-ngrde ninge.

¹³ Mzlengeng x inwengeng, krlzx kx trkrlezkapo bz kc mz nzapu-krnge jiszs. A' da kx rtrngzti-zvzbo nide sele. Mrbrtr mz drtwrnge dalr mzli kc, x yrnitrx mz bz lc tqobqtippx nakrlzbz.

¹⁴ Nzmnc-krnge mz nrlc apule nzesangr. X sa tqvo-zvzx mz nzayrkrpx-krnge nzesangr lc, murde natwzx da kxmrlz kx Gct nakabzle mz krkcng tqkqleleng, kx namncng badr Heven kalr murde nzaxvctr-lzbqbnz mz Mevalu Jiszs.

¹⁵ Nigu amrlx ngrgu kcng tzbrpeng mz nzmnc-ngr kxtr, nalxngiti-kzku natqnge lcong. A' nzmu drtwr kzdu nimu kx tqblepxle, sa na-aelwapx-ngrbz Gct badr drtwr kxtubq.

¹⁶ Navz zvz nzvz-nqblq-krngu da angidr kc tqtwzpeku.

¹⁷ Mzli ka kx mzlengeng x inwengeng, navz-nqblqamu nqm qkrngeng x nqm qkr leplz kcng tzmnc-nqblqlr nqm qkr, nigr aposol.

¹⁸ Murde leplz kxznkqqlung, trnzlxngitilru nzbzo-krm Kraes mz kros. Ycmnetr-ngrbo nidr nzwrde kqlupe, x mzli ka pi-mopo bamu nqm q krdr mz nzyrningr.

¹⁹ Murde lrpzki lc tzvz-nqblqlr mailzle nidr mz Hxl, mz nzodati-alongr nidr. Trnzwztrp-wzung mz Gct, a' nzvz-nqblqlr da kx suti drtwr nrkrdrdqdr. Nzrtrngzbzng da kx myangr drtq x nzglqpx-lzbq-ngrdr. Nzaoti txpwz drtwrdr dalr nrlc.

²⁰ A' nigu, mrnyzgu ycpe Heven, x aenzliku Mevalu x Kxetu rgu Jiszs Kxnmcp, naprpxm mrlcde.

²¹ X mz nyzylu-krmle lc, sa natekqtrpzle nrkr-drtqgu mz nrkrdrdq kxluli mz nzapu-krdr nrkr-drtqde, mz zmatq kcpwz tqacive-ngrde doa x da amrlx mz nrlc.

4

Nzlc-apqbzkr Pol

¹ Mz nzmu-krde lcde, tu-amqngitrpzmu mz Kxetu rgu, da kc tqwai nzpi-krbole bamu. Nimu kztengeng kx mrlzti-zlwzx. Mzli ka sutitx zlwz drtwrnge nzrmcng r nimu. Murde aelalz-zvmamu drtwrnge x apuamu da kxmrlz kx sa natwzx mz nzokatr-krnge nimu mz nzrlxngiti-krmu.

² X mzli ka napitxbo bamu, nimu Yuodia x Sidike, kx bzkq talwzamu. A' drtwrmu naesz'ti, mz nzapu-krmu ile-lzbq, mz nzaodukr Kxetu rgu.

³ Susugos, nim mrlx kztenge angidr. Rlx tibo bam, okatrpz olvz lcng nzling mz nzwztr-zvz-krbzlr mz Kraes. Murde olvz lcng wz-lxblrkr

badr, mz nzlepx-krgr Nrpakxmrlz, x Klemen badr kzdung kz leplz. X krlzx kx drtqdr yclzm mz Buk r Nzlungr, mrkc tqyrongr Gct drtq leplz kcng namncng mz nzlungr kxboi.

⁴ Naelalz-zvz-ngrm drtwrmu Kxetu rgu. X napi-mopwc' kx, naelalz-ngrm drtwrmu.

⁵ Na-aenzli-zpwxamu leplz amrlx. Murde Kxetu rgu ycpe pipz nzvz-krmle.

⁶ Bzkq drtwrmu yclwz mz da, a' rlxibzmu mz Gct mz nzkrka'ngr x awibzmu bade mz da amrlx.

⁷ Zbz nrwx x nzmnc-zpwxngr kc tryrplatitrp-wzu nargu, sa navzom mz drtwrmu x nabzmu mz nzaxvctr-lzbq-krbzmu mz Mevalu Jiszs.

⁸ Mzlengeng x inwengeng, napitx-mopwc' kx na-aoti zvz drtwrmu da angidr, da kxmrlz, da kxtubq, da kxlqngi, da kxtr, da kxmyapx-esz'ngr, x da amrlx kx takitrde nzamrluengr x nzrglqpxngr.

⁹ Na-ale-zvzamu da kx alvztr-ngrne nimu mz natqngeng x mz nzmnc-krnge. X Gct kc tqrkam bagu nzmnc-zpwxngr, sa namncbz bamu.

Pol Awibz Mz Lr Filipae

¹⁰ Awi-zlwz-ngrbo mz Kxetu rgu, nzyc-moukr mz drtwrmu ninge mzli ka. Murde mzli boitxpe trpengr da kx aleamu mz nzokatr-krmu ninge. Trngiu murde traotiu drtwrmu ninge, a' trpnzngr mzli rde.

¹¹ Trpi-ngrpwc'u da lc murde mnctxpax mz da. Murde alvztr-lzbqpenge mz nzmnc-zpwxngr kxmule-esz' trpnzngr da, mz nzmnc-xgle-krnge Jiszs.

¹² Kzdung mzli mncx mz mzli kx rblx ngr da, x kzdung mzli mnc-kzx mz mzli kx kqlu ngr da. A' alvztr-lzbqpenge mz nzmnc-zpwxngr mz da amrlx, kxmule-esz' mz nzmungr kx krlcng nelz mz nzrngisc-krnge da, o nzmungr kx trnzkrlic-ngru mz nzngini-krnge nra-nzlu ngr leplz.

¹³ Krlzx nzalengr da amrlx mz nzvz-nqblq-krde me pnz drtwr Gct, mz nzokatrkr Jiszs Kxnmcpx.

¹⁴ A' mrlzm bange nzokatr-krmu ninge mz mzli r nzxpu-krngeng mzli ka.

¹⁵ Murde nimu lr Filipae krlz-angidramu kx okatr-zvzamu ninge. Mzli lc tqrkalz-ngrmc mz Provins nyzmu Masedonia mz nzyapwxtipx-krnge Nrpakxmrlz, dzbe lrmakxtr nyzmu txpwz kc tqokatrple ninge.

¹⁶ X mzli kc tqmncpe-ngrne mztea Tesalonika mz nzsutikr drtwrnge trau, tqatwzlr-zvz-ngrmamu trau, mz nzokatrngr ninge.

¹⁷ A' trsutiu drtwrnge nzrka-krmamu scnge da mzli ka. A' da kx sutibz drtwrnge bamu, kx Gct na-abrtzlvzle nimu mz nzrka-nrbalq-krmu.

¹⁸ Twzpex da amrlx kcng tqatwzlr-ngrmamu bange. X nzrngisc-krnge da myaszpxpele da kx takitrde nzmnc-krnge. Trpnzngr mou da kx suti drtwrnge, murde Epafroditzs kapemle bange da kcng tqokatr-ngrnamu ninge. Da lc tqapule blz kx mnrte mrlz zlwz, kx abrtzlvz Gct x elalz-ngrm drtwrde.

¹⁹ X Gct rnge sa nakabzle bamu da amrlx kx takitrde nzmnc-krmu, mz nzaxvctr-krbzmu mz Mevalu Jiszs, murde nide bcnyr kx myapx-esz'ngr.

²⁰ Naglqpxku Trtegu Gct, tqvzpe tqvzpe. Eu, angida.

Natq Ngr Nzarlz-lzbqngr

²¹ Rpibo “Nimu la,” mz leplz kxnztrng ne Mevalu Jiszs amrlx mrla. X mzlegung kcng mrka nzrpi-kzpzlr bamu kx, “Nimu la.”

²² Leplz ne Gct amrlx kcng mrka nzrpi-kzpzlr kx, “Nimu la,” myapxbz leplz ngr ma nyz King kxetu kc mrka Rom.

²³ Krka'-ngrne kx Kxetu rgu Jiszs Kxnzmcpx naokatrle nimu mz zmrlz ngrde kxmyalz.

Delape. Ninge *Pol*.

Nzryrngrkxtr Kc Ate Rut x Sam
The New Testament plus Ruth and Psalms is the
Natügu language of the Solomon Islands
Buk Baibel long langguis Natqgu

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

PDF generated using Haiola and XeLaTeX on 18 Apr 2025 from source files dated 31 Aug 2023

fb2b7f06-e254-5fb7-b59d-ee21d5d7a93f